

storiani, Jacobini & Georgiani. Hæc de itinere, quod ab *Aconensi* urbe versus *Bo-ream* tendit, dicta sufficiant. Nunc aliud iter prosequamur, quod scilicet ab *Acone* versus *Vulturnum* ducit.

C A P. I V.

Iter ab Acone versus Vulturnum.

Igitur ab Acone quatuor leucarum spatio est *Castellum Indi*, dictum *Saron*, in montanis situm, quod fuit domus fratrum Teutonicorum, sed modo in ruinis jacet. Hinc ad leucam unam est *castrum regium*, omnibus abundans bonis, sed à Saracenis modò occupatur. Ab hoc loco si destinatum iter prosequaris, exactis quatuor leucis, venies contra *aquas Maron*, ubi est *vallis*, in qua Eber Cinæus tederat tabernaculum, haud longè à civitate Affor, cujus uxor, nempe Jahel, Sifarum principem militiæ Jabin regis Affor, clavo in tabernaculo per tempora fixo interfecit, Jud. iv: 21. Ab ista valle usque ad *castrum Sabul*, quod Saraceni *Zabul* vocant, à quo terra illa *Zabul* vocatur, sunt leucæ tres. A quo si versus Austrum per tres leucas perrexeris, occurret *castrum & civitas Sephet*, quæ aliquando fuerunt de dominio militiæ templi; *Castrum* est firmissimum & elegans, in altissimo monte situm, sed per Soldanum captum, & hodiè in magnam Christianorum jacturam ab illo possidetur, unde totam Galilæam, hoc est tribum Zabulon, Nephtalim, Aser, Issaschar, Manasse, & omnem terram usque ad Tyrum & Sidonem subactam tenet. Inde contra Aquilonem ad quatuor leucas est *Cedes Nephtalim*, quæ fuit civitas fugitivorum in tribu Nephtalim, & abundat omnibus bonis. Monstrantur illic magnæ ruinæ, & sepulchra pulcherrima antiquorum. De castro Sephet per tres leucas, in descensu montis contra orientem, ad jactum lapidis à mari Galilææ, est *Mons* ille, quem toties servator noster Christus ascendit, in quo fecit sermonem illum salutarem, quem divus Matthæus describit, Matth. v. & in quo de quinque panibus & duobus discibus satiavit quinque millia hominum, Matth. xiv. 19, 20, 21. In hunc quoque montem fugit, quum populus eum vellet facere regem: ibi docuit discipulos orare, Luc. xi. 1. ubi & ipse sæpè pernox fuit in oratione, Luc. vi. 12. Ibi à Centurione fuit interpellatus pro puero paralytico curando. Hic quoque venit ad eum multitudo languentium, & suo tactu mundavit leprosum, Matth. vii. 1. 3. Ab hoc monte videri potest totum mare Galilææ, Ituræa & Traconitidis regio usque ad montem Libanum. Continet longitudo ejus duos jactus arcus, latitudo verò habet solum jactum lapidis: totus est herbosus & amœnus. In pede hujus montis paululum à mari oritur *Fons vivus*, quem quidam somniant venam esse Nili: Josephus vero appellat eum *Capernaum*, à quo etiam tota illa regio, usque ad Jordanem, per tres leucas, *Capernaum* nominatur. Ab hoc fonte si ieris per viginti passus supra mare Galilææ, est locus ubi Christus post resurrectionem suam stetit in littore, dicens discipulis piscantibus: Joh. xxi: 5. *Pueri nunquid pulmentarium habetis?* Ab eo loco orientem versus per unam leucam est *Capernaum* civitas quondam gloriosa, sed nunc vicus humilis, vix septem habens casas piscatorum, ut adimpleretur verbum Christi ita loquentis, Matth. xi: 23. *Et tu Capernaum, si in cælum ascendes, usque ad infernum demergeris.* Ab hoc loco sunt tres leucæ ad ascensum *Montis Sanir*, ubi scilicet est introitus Idumææ. Et superatis iterum tribus leucis, occurret *Cedar* civitas gloriosa, juxta montem Sanir infimo loco contra orientem sita. Per hanc civitatem & per littus maris Galilææ transit via ducens ad occidentem, quam Isaias vocat *viam maris*, Jes. xlii: 16. quòd trans Jordanem in Galilæa gentium juxta littus maris procedat. Ab hoc loco, ubi *Jordanis mare influit*, usque in *Cedes Nephtalim* sunt quatuor leucæ, & in meditullio itineris est *Maron aquarum*, vallis quædam sic vocata, per quam transiens Jordanis cursum suum versus orientem flectit. Proinde à civitate Corozaim, & ostio fluvii Jordanis contra Aquilonem sunt quatuor leucæ ad *Suetam* civitatem, unde fuit *Bildad Suites*. Monstratur ibi *pyramis beati Jobi*. Ad hujus loci campestria conveniunt Saraceni